



شعر: سالم بن أحمد البديد المناعي

## (تباهي يا محرق !!)



تناغم يا قصيدي وانت طير وخابرك حوام  
على دار المحرق قبل ماتحكي حزاويها  
تجيني والزمن درعي وتذكرك المكان حزام  
مدام الحد يا (بيت البديد) اصبحت غاليها  
على ذكر المحرق.. / بينها وبينني شعور اتوام  
احس اني مزعلها وانا توني مرضيها !  
معزتها بخفوقي ما أبد تشرى ولا تنسام  
واذا فيها مساوم قلت بايعها وشاريها  
واذا به من تسائل عنها يبشر ولا ينلام  
يجاوبه الذي ربي بها ولا ربي فيها  
تضيق ابها الاماكن / والشوارع / والطريق العام  
ولا هي مثل ماتمتاز لندن في ضواحيها  
تميزها على ذكر الصلاة وماضي القدم  
نعيش ونقتدي باجدادنا فدوة مباديها  
قبل وان كانت الدنيا بسيطة نجبر الايام  
وحننا يوم كنا في بساطتنا نحنايها  
اذا كانت بلاويها.. حكاية تشبه الاحلام  
عسى الله لا يعافي كل ديرة من بلاويها  
يكفي فخر بانك قد حضنتي ماضي الحكام  
وبانك قد طرقتي عند حاضرها وماضيها  
ولك بالخصوص تاريخ عريق وحاضرك مقدم  
ولك بالفضن من يتنومس اليا جاب اساميها  
ولك عند الرياضة مايتعب حاصي الارقام  
ولك بين الجماهير الغفيره فعل يرضيها  
ولك صفحة / ولك هيبة / ولك سيد / ولك خدام  
ولك نظرة تلملم آخر الدنيا حوايها  
ولك موجة تسابق ذبذبات اوزارة الاعلام

وشهرة صعب الاقمار الصناعية تغطيها  
عوايدنا ابد ماتنحني بالشعر والالهام  
ولاني ناوي اتحدى عوايدنا واجاريها  
نعرف ان البراري جو به صيده وبه عزام  
وكيف الحر بالمرقاب طامع في حباريها  
ولكننا ربينا فالبحر مانعرف استسلام  
واذا ماتاتي الاعماق نعرف كيف ناتيها  
الا ياناس خلوها تباهي من هنا لشام  
وهي من حقها لامن تمدت في تغليها  
فداك الشعر واركانه ولكن للظروف احكام  
وابي منك السموحة كاني امقصر.. تمشيها  
انا جيتك بروح الشعر لكن الوعد قدام  
واجيك بروحي اللي سيرتك بالله تحييها